

Black Diamond y Mighty Campo monarcanan di Calypso y Roadmarch



ORANJESTAD(AAN)— Diadomingo mainta un cuatro pa cuatro e ultimo cantante a caba di haci su presentacion pa hurado sigui despues pa deliberacionnan riba e final di concurso di calypso y roadmarch di e aña aki. E anochi a cuminsa cu protesta contra e seccion VIP den Lago Sport park y a termina tambe cu discusion, pero e biaha aki di

miembronan di hurado.

Tabata tin hasta comenta cu dos miembro di hurado, otronan ta menciona 4, a bandona sala di deliberacionnan relaciona cu discusionnan riba e votacion cu a tuma lugar; pero cu no a logra confirma oficialmente ayera.

Varios di e cantantenan a protesta contra e seccion di VIP cu SAC a bin cune e aña

aki y cu a resulta di no a funciona tampoco.

Cantantenan kier a mira nan publico nan dilanti y no tras di un seccion cera cu masha espacio cu a bay perdi mientras cu e publico cu a bin pa sostene nan ta para te leu patras di e seccion aki.

E concurso si a desaroya cu un competencia hopi fuerte entre e finalistanan pa tanto calypso como roadmarch.

Na final por a tende nombrenan di Easy, Long Roy, Mighty Mike, Doggy, Ruth, y Sasha entre esnan cu lo por sorprende e favoritonan cu tabata T-Money di Le Groove, Mighty Campo di Search, The Baron di NBO. Tambe cu Kaiso Teddy no a defende su titulo y cu lo por cay afo, y no a menciona casi number di Rusty, ni di Tatoo den e favoritonan pa premiacion di Roadmarch.

Finalmente e sorpresa a cay, ora cu a menciona Tatoo cu su Dip the mojito na di 5 lugar y Rusty cu su Soca days of the Week na di 4 lugar, y Kaiso Teddy na di 3 lugar.

E publico a spera aki di tende di T-Money, The Baron, y number di T-Money a ser menciona como runnerup, y finalmente e bom a dal den Joe Laveist Ballpark ora cu a menciona number di Mighty Campo como Rey di Roadmarch. The Baron cu tabata un di e dos favoritonan grandi, a keda for di premiacion. Aki tambe hopi di e publico a bandona Sport



Park mes ora y un ambiente di tristeza a reina.

Den e categoria di Calypso, Whitey y Queen Melody a figura como e posibel candidatonan pa e corona y cu Black Diamond, Gario hopi cerca pa di tres lugar, mientras cu tabata spera riba Mr Unique pa defende su corona. E publico por a acepta cu T-Money a termina na di 5 lugar, pero e prome sorpresa aki tabata cu Whitey a termina na di 4 lugar y cu Tatoo cu hunto u hammer y Skinny tabata den espera di por cay den premiacion, a bin sorprende cu e di 3 lugar. E pensamiento na e momento ey

tabata cu Queen Melody of Gario lo bay cu e corona, y a bin resulta cu Queen Melody, Emily Peterson a bira runnerup y Antoni Gario a bira rey di calypso un biaha mas, mientras cu Mr Unique cu a duna mihor presentacion cu aña pasa cu el a gana su titulo a keda for di premiacion. Ronwayne Kock, Mr. Unique y The Big Q. Quincy Hasham kende sorprendientemente tambe a keda for di clasificacion e aña aki por ta sigur cu nan a habri caminda pa sanger nobo drenta entre e grandinan y clasifica finalmente entre e mihor cinconan.